

SIARAN MEDIA

Kuala Lumpur, 15 September 2017

Pelaburan Khazanah di Amerika Syarikat

Kami merujuk kepada beberapa laporan berita dan kenyataan berkenaan pelaburan Khazanah Nasional Berhad (“Khazanah”) di Amerika Syarikat, berikutan lawatan rasmi Perdana Menteri Malaysia, YAB Dato’ Sri Mohd Najib Tun Abdul Razak ke negara tersebut, baru-baru ini.

Selari dengan usahanya untuk mempelbagaikan portfolio pelaburan luar negara secara progresif, Khazanah telah membuka sebuah pejabat di Amerika Syarikat, Khazanah Americas Incorporated di San Francisco dengan tumpuan kepada sektor inovasi dan teknologi. Dibuka pada tahun 2013, pejabat Khazanah di San Francisco merupakan pejabat luar negaranya yang ketiga selepas pembukaan pejabat di Beijing dan Mumbai. Khazanah seterusnya membuka dua lagi pejabat di luar negara, iaitu di Istanbul dan London.

Sehingga kini, Khazanah telah membuat sejumlah 15 pelaburan di Amerika Syarikat yang bernilai kira-kira USD410 juta, terutamanya dalam sektor teknologi. Pelaburan Khazanah di Amerika Syarikat mewakili kira-kira 1.3 peratus daripada keseluruhan portfolio Nilai Aset Boleh Direalisasikan (“RAV”) Khazanah yang berjumlah RM145.3 bilion setakat 31 Disember 2016.

Khazanah menetapkan amalan penilaian yang ketat bagi setiap pelaburan, yang melibatkan pemeriksaan terperinci dan beberapa tahap penilaian pelaburan sebelum dibentangkan kepada Lembaga Pengarah Khazanah untuk pertimbangan dan seterusnya kelulusan. Secara keseluruhannya, penciptaan nilai jangka panjang daripada portfolio pelaburan Khazanah kekal utuh dengan portfolio Nilai Boleh Dilaraskan (“NWA”) meningkat sebanyak 3.1 kali ganda atau berkembang pada Kadar Pertumbuhan Tahunan Terkumpul (“CAGR”) sebanyak 9.3% setiap tahun untuk tempoh dari Mei 2004 hingga 31 Disember 2016.

Selaras dengan mandat Khazanah sebagai dana pelaburan strategik negara bagi mewujudkan nilai jangka panjang untuk Malaysia melalui pelbagai sektor dan kawasan, Khazanah akan terus meneroka pelbagai peluang pelaburan lain di Amerika Syarikat dengan tumpuan khusus diberikan kepada sektor inovasi dan teknologi.

TAMAT

Untuk sebarang maklumat lanjut, sila hubungi Mohd Raslan Md Sharif di talian tel +603 2034 000 atau e-mel raslan.sharif@khazanah.com.my.

Tentang Khazanah Nasional

Khazanah Nasional Berhad adalah dana pelaburan strategik Kerajaan Malaysia yang diamanahkan untuk menguruskan aset-aset komersial milik Kerajaan dan melaksanakan pelaburan-pelaburan strategik. Khazanah terlibat dalam pelbagai sektor seperti tenaga, telekomunikasi, institusi kewangan, penjagaan kesihatan, penerbangan, infrastruktur, riadah & pelancongan, hartanah kreatif & media, pendidikan dan inovasi & teknologi. Antara syarikat tersenarai utama di bawah



KHAZANAH
NASIONAL

portfolio pelaburan Khazanah adalah Telekom Malaysia Bhd, Tenaga Nasional Bhd, CIMB Group, Axiata Group Bhd, IHH Healthcare Bhd, Malaysia Airports Holdings Bhd dan UEM Sunrise Bhd. Untuk sebarang maklumat lanjut mengenai Khazanah, sila lawati www.khazanah.com.my